

Ханты ясăң



Основана
1 ноября 1957 года

15.01.2026
№1 (3685)

Йилдун 2026-мит ол пида!



Ёмвошн Йилдун ол ёмăңхăтл пурайн нюки хотăң вош хулы рăпитăс. П. Молданов вўюм хур

Округ мир
пăта путăртум
ясăят

» 3

Муй вўрн хурамтум
хăл юх ма
вăлупсема юхтăс

» 6

50 ол мър и
нумăсн, и сăмн
вăлďăңăн

» 12



Тата мосванән, ван хәтлуп тыләш 16-мит хәтәлн, Ёмвошн «Россия» нѐмуп Национальной центр тәхи пүншсы. Щимәш тәхи сырыя Владивосток вошн ләщәтсы, шәлта Красноярск вош хуша. Щи киньша па хәлмит ищи хурасуп арсыр хот йитәң тәхи мўң Югра мўв округев 95-мит ода питум ёмәңхәтл, пурайн ямсыева тата ләщәтсы па пүншсы.

Ёмвошн «Россия» нѐмуп тәхи пүншсы



▲ «Россия» нѐмуп тәхи пүншум пурайн. В. Енов верум хур

Мет оләңн «Россия» нѐмуп тәхи Ёмвошн вантты па тәса арталәты Президент хуша арсыр поступсы верты ләңқәр хә А. Жарич, округев кәща хә Р. Кухарук па ин йилпа пүншум тәхи кәща не Н. Виртуозова вәсәт. Сырыя мойң хәннәхәйт вўдең хәнтәт хуша нюки хотәта яңхсәт, хута кавәртум сорт хўдн ләпәтсыйт па шайн яньшдтәсыйт.

Шәлта кәща ёхлўв «Россия» Национальной центр хота мәнсәт.

Щи тәхийн лыв арсыр хот йитәт хўват тәтылсыйт па сыр-сыр ванлтупсәтн альсыйт. И хот йитн мўв илпиташ кәншты хәннәхәйт оләңн пурмәсәт па мосты шўңкәт вантсәт. Кимит хот йитн ямсыева уша версәт, муй ширн хәннәхуятәт мўв илпи ташәтнух әмәртсәт. Хәлмит хот йитн хәнтәт, вухалят па юрнәт вәлупсы ширәт уша павәтсәт. Нядмит хот йитн «Герои Отечества» ванлтупсы арталәсәт па уша вўсәт, муй ширн Югра мўв хәйт Вулаң далә хәрәтн даләсәт. Шәлта вантсәт, хути далә пураитн округ хуша пиршамум хәйт-неңәт па айлат пухәт-эвет тарма рәпитсәт.

Шәлта Югра мўв па мойң хәннәхуятәт мет вән хот йит хуша әктәшсәт. Лыв елпелн онлайн ширн Россия мўвев Президент

администрация тәхийн рәпитты кәща хә С.В. Кириенко Россия мўвев Президент В.В. Путин китум айкел, тәс. Лўв тәмиты путәртәс:

» Әмәш вантты, «Россия» нѐмуп Национальной центр нын округн хуша тәмхәтл тўңширәңа пүншсы. Ма ширемн, щит шеңк вән вер. Вантә, нын хушана иса ар мўв илпи таш ар ол мәр нух әмәртды. Щи унтасн тәмхәтл нын Югра мўвн хуша арсыр кәртәт па вошәт омәсыйт, кев па карты әшәт версыйт, йилпа вәлты хотәт, пәльницайт, ашколайт, колледжәт, университетәт па арсыр рўтьшәты тәхет ләщәтсыйт. Нын округн тәм пўш 95-мит ол ёмәңхәтл постәс, нын хушана шуши мирәт, хәнтәт, вухалят па юрнәт вәлупсы ширдәл ин тәмхәтл вәнты елды тәләт. Щит нын верты вердән. Тумтака, тәлаңа тәм нуви тәрум илпийн ищиты елды вәлаты!

Щи ясәт юпийн Уральской федеральной округ хуша вәлты Россия мўвев Президент ләңқәр хә А. Жога онлайн ширн вўща ясәң Югра мўвев хәннәхуятәта китәс.

Лўв лупәс:

» Ешәк Руслан Николаевич па Югра мўв хәннәхәйт, ям вўща

ясәң ма нынана китлум, Ёмвошн «Россия» нѐмуп Национальной тәхи пүншсәты! Нын мет оләңн Уральской федеральной округ хуша щи тәхи ләщәтсәты. Щит пәта сыр-сыр культура верәт, вәнл-тыйлты ширәт, мастер-классәт муй вәйтәнтупсәт щимәш ләшкәм па вән хотн елды вәлты-холты ширәтн тўңширәңа па тәса верты веритләты. Мет вулаң вер, ма ширемн, нын Югра мўвн оләңн арсыр ванлтупсәт па Россия мўвәт кўтн ин альтыя шир тәйләты!

Округ кәща хә Руслан Кухарук ям вўща ясәң ар мир елпийн верәс па путәртәс:

» Ешәк хәйт па неңәт, ям щи вер, хути мўң Югра мўвевн тәмхәтл «Россия» нѐмуп тәхи пүншсўв! Щит пәта ма Президент хәя ищи лупсум, мўң шеңк ләңхәлўв тәта щимәш вән хот ләщәтты, хута дәлн ар тәхи эвәлт юхәтты хәннәхуятәт ищи ат веритсәт Югра мўв оләңн аршәк вер ушәңа-сәшәңа верты. Тәта мўң мўв илпи ташәт кәншты хуятлўв оләңн арсыр айкеләт хәләнты па вантты ширәт тәйлўв, хәнтәт, вухалят па юрнәт вәлты-холты хурасәт ищиты уша павәтты веритлўв. Щи тумпийн тәта арсыр ванлтупсәт, адисупсәт, вән мирхотәт па ёмәңхәтләт ищиты кашәң пўш тўңширәңа ләщәтты питлўв. Шеңк ләңхәлум пәмәшпа ясәң лупты тәм ар йитпи хотәң тәхев омсум хуятәта! Мўң худыева ийха тәм тәхи омәсты пәта вешкәта рәпитсўв. Щит пәта елды яма, тумтака вәлаты!

Р. Кухарук щи тәхи кәща неңа Н. Виртуозова «За укрепление дружбы и сотрудничества» мевл пос мойләс.

«Россия» нѐмуп тәхи пүншты юпийн, арсыр мосты ванлтупсәт, ёмәңхәтләт, кәсупсәт, елды ләщәтты питлўйт.

Путәр хәншәс:
Владимир Енов



A.B. Жога

Тынаң ләхсәт!

2025-мит ол ши сухәнл. Арсыр верәт тәм олн вәсәт, тәх верәт амәт тәсәт, лавәртшәк суртәтн мўң таксар әха йисүв, йха талсаюв, тәх верәтн йилуп пища хуцсаюв.

Вулаң далын нух питум верев пәта мўң ёмәңхәтл ләшәтйилсүв, хәлум пўш әктәшйилсүв па мирхотәт верәнтйилсүв. Щирн мўң йм вўща ясаң пугәртсүв рәпитты мирев, далъ хәрн вәлум әхлүв пәта, мәта хуятлүв далъ пәнт хўват шәшман мўң мўвев лавәлман вәсәт па кәсты тәхетниши нух питйилсәт.

Мўң әртәйлүв, хән ийха катләсман вәллүв. Мўң ар лавәрт сурт йм щира керәтсүв, кашәң щимәщ вер – щит ийха и нумәсн, и тәхия шәшты верев.

Мўвевн вән па ай вошәт йма ләшәтлайт, әшколайт па пәльница хотәт енумләт, спорт щира вәлты йилуп хәрәт пўншлайт, йңхты әшәт йма ләшәтлайт.

Тәп мет тынаң па мет мосты ут – щит нын. Мўвевн вәлләт каркама рәпитты, ар йм нумәс тайты па мўвев-ийңкев сәмәңа

тайты әх.

Нын әренән, нын щоменән мўвевн вәлупсы мира мәстәты щира, уяңа па хәтләң хәтл щира йис.

Йилпа йиты 2026-мит ол – щит Россия хуца вәлты мирев ийха пилтәшты ол.

В. В. Путин ясаңаң:

» Мўңева вана тайты мосл мўвтел мирев па арсыр мирев ийха пилтәшты верәт. Щит мўң юкан щира па оса щира вәлты пищев.

Кев мўвев – щит иса пўш арсыр мир ийха вәйтантийлты мўв. Щи мирев йис вәлупсы мўңева шавиман тайты мосл па йилпа енумты нявремәта елды юкантты.

Тынаң мўвн вәлты әх! Йилуп ол нынана ар амәт па йм вәлупсы ат тәл. Нын хотәң әхләң сәмәңа, амтәтљюман па күтәлн нәтәсман ат вәлләт.

Мет йм ясаң китлүм Урал мирева, мәта әх тәм йис далъ хәрн вәсәт. Йм, сәмәң ясаң нынана Родина мўвев лавәлман тайты пәта! Мўң нух питлүв!

Ләхсәт, тәлаңа, йма вәлаты, йм нумәс па иса верәт йма ат мәнләт!

Йилуп 2026-мит ол пида!

УрФО хуца Россия президента нәтты хә
Артём Жога

Хәнты ясаңа тулмаштәс:
Пётр Молданов



P.H. Кухарук

Югра мўв тынаң хәннехуятәт!

Йилуп ол пида! Тәм ёмәңхәтл пурайн мўң арсыр әмәщ верәта эвәллүв. Щи верәтн сыр-сыр тәхетн вәлләдәт – мўв илпи питы вуй вўты тәхи сый, класс хуца нявремәт киникайт лопсәт кертийлты сый, вўлең әхләт мәнты соләң сый, әрәң-щомәң кәсты әх мевл посәт сый, округ рәпитты әх, хуйтат кашәң хәтл рәт мўвев пәта така рәпитләт.

Мәнум олн мўң ийха Югра мўвев йис вәлупсы хәншсүв. Мўв илпи 13 миллиард тонна аратпиты вуй нух талсүв – щит иса Россия мўвев пәта вулаң вер. Хәнты ши вер олңитум әх иты мўң ищиты ши апраңа рәпитлүв.

Округ вошәт па кәртәт күтн йңхты пәта кев әшәт, нурләт йилпатсүв, йилуп тухләң хопәт йңхты питсәт. Нявремлүв пәта иса мосты хотәт омәссүв: йилуп әшколайт, пәльницайт, культура хотәт па әрәңа-щомәңа йиты пәта хотәт. Ёмвошн «Город трудовой доблести» кев хурас, «Россия» национальной центр па Сәрханл вошн Ас

шәпи «Звезда Оби» нурәл омәссыт.

Югра – щит Тәрум Ащевн миюм сәщ тайты па дыпи әр тайты әх мўв. Вулаң Победа 80 ол постуман нявремәта тарма даләсум әх оләңән пугәртсүв. Интәм даләсты солтатлүв унтасн ел вәлупсы оләңән нәмәсты веритлүв. Кашәң хәтл мўвев пәта даләсты солтатлүва вән пәмәщипа луплүв. Мўң и ёшн лыведа нәтлүв па эвәллүв – щит тәм йисн Россияев пәта мет вулаң вер!

Югра мўвев 95 ол постум пурайн сыры тарма па интәм щиты ши йма рәпитты әх оләңән нәмәлмәсүв, дәлн елды мўвев хурамәна па ташәңа ат йис.

Йилуп 2026-мит ол «Айлат хоттел әх ол» немн мәсүв. Елды йма па вешката рәпитты питлүв, дәлн нявремәт щўняңа па кашәң хотәң әх иса йма ат вәсәт. Ийха рәт мўвев пәта тарма рәпитты питлүв: йм вәлупсы ләшәтты, вән верәт верты, йилуп мосты хотәт па утәт омәсты.

Югра мўв тынаң әх! Сәм хәрәм вўш эвәлт нынана йм ясәт луплүм, тәлаңа, щўняңа, и нумәсн, систәм етәр хәры вәлаты. 2026-мит олн мўң аршәк йм па мосты вер верлүв!

Йилуп ол пида, Югра мўвев!

Округ кәща хә
Руслан Кухарук

Хәнты ясаңа тулмаштәс:
Людмила Гурьева

Газетаев лўңәтты тынаң әх!

Йилуп 2026-мит ол пида нынана йм вўща ясәт луплүв!

Кашәң ол ши ёмәңхәтләң мўң йм нумсәт, йм верәт оләңән нәмәслүв. Тәм ол нынана ар амәт па уй ат тәл.

Мўң нынана вән пәмәщипа ясаң луплүв, хути мәнум ол мәр мўң айкеллүв лўңәтсәты, йм посәт омәссәты. Елды мўң ищиты ши нын пәтана әмәщ айкеләт па шуши мир хәннехуятәт оләңән хәншты питлүв.

Тәлаңа, уяңа-пищәңа, йма хоттел әхләң пида вәлаты. Кашәң хәтл нынана амәт па йм айкеләт ат тәл. Ёмәңхәтл пида, тынаң хуятәт! Йилуп ол нынана йилуп верәт ат тәл!



N.B. Рагимова

Надежда Рагимова па «Хәнты ясаң» газетайн хәншты әх



Б.С. Хохряков

Округ мўвн вэлты ешәк ёх!

Округ дума депутатат па ма нынана тәм йилпа юхтум ол вўраңан вән вўща ясаң китлўв!

Тәм ёмәңхәтлән мўң нумәсләвн па сәмләвн ләңхалўв иса тумтака, щўняңа елды вэлты. Ям нумәсләв тәлўв елды вәлтэв щирәт олаңан. Ләлн

мўң вэлты Югра мўвиев па вән Россия мўвев мир әраңа па ташаңа ат вәлдәт.

Тәм йилпа юхтум 2026-мит ол Россия Президент иса мўвев луват вэлты мир тўңа-щирәңа и нумәсн, вешката вэлты щира ястәса.

Округ кәшаев Руслан Кухаруктәм юхтум 2026-мит ол йилпа тыйты семьяйт ола ёконтсәлдэ, ләлнтўңа-щирәңа айлат ёх ат вәсәт. Щит вўраңан мосл дыведа така нётты, уяңа ат вәлдәт па няврәмләл тәлаңа ат енмәлдәт.

Ешәк Югра мўвиевн вэлты тынәң хуятыет! Ташаңа, уяңа-пищәңа, тумтака вәлаты!

Округ Дума кәща хә **Борис Хохряков**

Хәнты ясаңа тулмаштәс: **Наталья Краснопеева**



Л.Д. Собянина

Югра мўв ешәк шуши мирәт – хәнтәт, вухалят па юрнәт!

Сәм хәрем эвәлт Йилуп 2026-мит ол пида ям ясаң луплум. Тәм ёмәңхәтл – щит йилуп нумсәт нын пәтана, хуйтат йис па мурта йис вәлупсы елды тәлдәт. Йилуп ол – щит йилуп верәт тәм вәлупсийн, щитәт яма ат мәнләт!

Йилуп олн ма нын пәдана вантман луплум – нын опрашлән иты тәм ишки мўвн яма вәлаты, лавәлман тәяты, дыв йис верләл, сорни ясәт, йис путрәт, моньшәт, арәт елды тўваты – щит мет тынәң мўң вән Россия мўвев пәта.

2026-мит олн нын пәтана ат тывләт:

– Нын верлән яма ат мәнләт, нын па хоттәл ёхлән тәлаңа ат вәлдәт!

– Вўды ташәтн ар пеши ат омәсләт, вәнтән ар вой, йиңкән ар хўл ат питл!

– Арсыр мирәт кўтн ләхсәңа вәлаты!

– Иса муй верты вўтышәлдәты – вераты!

– Опрашлўвн хәюм таш лавәлман тәяты па ел тўваты!

Най-Вәртәт нынан ат лавәлләт, хәтл, тылш па тәрүм тўт нын әшлән ат хәтләт! Нын няврәмлән кәрща, әраңа, нумсәңа ат енумләт па нын, вән хуятәт, хәләнтман ат вәлдәт!

Йилуп ол кашәң хота хошум, уй, мосты верәт ат тәл, ләлн елды мўң увәс мўвев ташәңа ат йис!

Йилуп 2026-мит ол пида, ешәк хәнты, вухаль па юрн мирәт!

Тюмень вошн вәлты «Хәс» ариты тәхи кәща не **Любовь Собянина**



Н.В. Ташланов

Тынәң хәннәхуятәт!

Ма нынана тәм Йилуп ол пида ям вўща ясәт китлум.

Сыры ма шеңк ләңхалум, ләлн нын тумтака па тәлаңа, рәт ёхланән мосман ат тайсийты, кашәң ай па вән вер нын хушана тәса па яма елды ат мәнәс. Ма сәмәңа хәнтәт,

вухалят, юрнәт тайлум, нын «Хәнты ясаң» газетайн ищи мўңева шеңк мосл. Интәлта айкел әкәтты ёха ям вўшайң ясәт китлум па ләңхалум, ләлн елды тумтака ат вәсты па аршәк тәс айкел ат версәты!

Округев сыр-сыр хәннәхуятәта ищиты ләңхалум тумтака па тәлаңа вәлты!

Округ дума депутат хә **Николай Ташланов**
Хәнты ясаңа тулмаштәс: **Владимир Енов**



Л.В. Кашлатова

Тынәң хәнты па манщи мир!

Етәп 2026-мет котән пан! Яма утатән, кашимушет ет ат мәнәт!

Нын хотатән рўвәңа па щўниңа ат питтәт, рутәхтәт тытәңа ат уттәт!

Йисәңа, нуптәңа, татәң ёш, татәң кўр ет пета утатән!

Любовь Кашлатова

(Ас кўтуп хәнтәт путрупсийн)



Д.А. Тарагупта (Лонгортова)

Югра мўв хәннәхөятәт!

Ялөп 2026-мет тәл пилн! Ямал мўв Лорвош район мир элты нынана тәмәщ хорам емәңхәтл кеша ям ясәт китлөм. Ялөп тәл кашәң хәтл сорния, хошама, сәмәңа ат питл!

Тәм емәңхәтл елпийн муй элты нөмсаты, щит ат тыйл!

Удөпса умәщ мойдөпсәт ат мойдәл, кўтәлн аршик ям па сәмәң хөятәт ат улдәт!

Тәлаң ёш, тәлаң кўр, хоттәл ёх пилн щўняңа улаты!

Ямал мўв культура заслуженной рупатнек **Диана Тарагупта (Лонгортова)**
(Лорвош хәнтәт путрупсийн)



Муй вўрн хурамтум хэл, юх ма вэлупсєма юхтас: Татьяна Молданова

Там йисн мўң вана тайлэв ёмәң Йилуп ол хәтлэв, ши хәтл пәта пори пәсан верәнтла ат кўтупн, ван хәтлуп тылщев 31-мит хәтл сухантыйн па Ас хәлты тылщев олаң хәтләл олңиттыйн. «Йилуп ол ёмәңхәтл пориты вер» поступсы 1699-мит олн Пётр I хәншәс, щирн лўв йилуп, Юлианской щира оләт лўңтәсты партсәлдэ. Мет олаң хот лыпийн хәл юх омсәлтәсы хон икев хотн – щит 1817-мит олн.

Там ёмәңхәтл Европа хуща вәлты ёх эвәлт юхтас. Щит дыв йис пориты верәт эвәлт тывум уг. Әхәт па йис рўшәт пориты верәт пида лылләс. Щит пәта рўшәтн вана вўсы па рўш ёмәңхәтлә ши йис. Арсыр мирев йис верәт ки вўты, ши кўтн па хәнтәт олаңан ки луплўв, йилуп ол щира лўңәтты ёмәңхәтл тәл кўтупн ән верәнтса. Йилуп ол олаң хәтл – щит Тәрум ащев па щира керләты хәтл, тови пәда муй па тәл пәда керләталн – щит йилуп ола лўңәтса. Хәнтәт хуща йилуп ол олаң хәтл постуман вәс, хән Тәрум ащев тови пәда керләләс, щит хәтл, хән мўң мўвева морты мўв тухләң войт юхәтты питләт, мўң вәлэв, мет олаң тыв вурңайт юхәтләт, вурңа юхәтты хәтл йилуп ол олаң хәтлә ши лўңәтса. Тәх мирев па йилуп ол олаң хәтлә лўң-тыйлсәт вўлэт па кўрәң войт вохантты хәтләт, па щирәт па вәсәт. Ши хәтләт верәнтсайт товийн муй па сўсн. Там хәтл хурасуп Ёмәңхәтл, хән хәл юх хота омсәлтәды па мойлупсәт ёха мойләдыйт, хәнтәт щимәщ хәтл ән тайсәт.

Там хәтл арал пеләк хәнтлўв вәнт кәртәт эвәлт йира питсәт, ай вошәт па вән вошәт хәра павтәссәт, щит пәта рўшәт иты тәмәщ ёмәңхәтл верәнтты питсәт. Мўң вәна ювум хәннәхә Татьяна Александровна Молданова эвәлт инь-щәссўв, хән лўв мет олаң



▲ Т.А. Молданова. П. Молданов верум хур

пўш хотн омсәлтәты хурамәң хәл юх шиваләс па хән Йилуп ол ёмәңхәтләтн пори пәсан верты питәс.

Татьяна Александровна сема питәс Вўтвошн Сўмәтвош районән. Хәлмит класс вәнта ши вошн вәнт-тыләс. Щит 1957–1959-мит оләтн, Вўтвошн вәлүм хәнтәт щирн, тәл Йилуп ол ёмәңхәтл ән тайсәт, әшколайн хәл юх ищи ән омсәлтыйлса.

Мет олаң юхи тўвум хәл юх лўв шиваләс әшколая мәнум оләлн.

» Ши хәл юх ма шиваләсум рўш леккар ими хотн – щит Антонина Игнатьевна Аликова. Вәсәт муй әнтә ши юх хуща юнтты утәт, щит ма иса ән нәмләм. Нумсәмн хәла ихтум каләщәт тәп хәщсәт, ши каләщәт щәлта мўңева ортсайт. Ши

пурайн Вўтвоша мавәт муй па печенья нянят ән тәтылсыйт, мосәң, ши пәта каләщәт вәсәт. Әхәт па, хән мўң Касума касәлсўв, ма мет олаң пўш нумсәмн хәщсәс хурамтум хәл юх, ши юх әшколайн вәс. Щирн урокәтн мўң непекәт арсыр олүпн нерийлсўв, па вутаңшәк рәсәңа щира эвтылсўв, ши юпийн ийха лак щира аймиийлсўв па ши лакәт ийха кәртыйлсўв. Щимәщ кәртум кәрәтн хәл юхев хурамтуман ши вәс. Мойлупсийн мийләсыюв муй әнтә, ши вер ән нәмләм. Мийләсыюв ки, алпа, нумәсн амтум рўвл хәщсәс, – путәртәл Татьяна Александровна.

Мет олаң ёлка әңкеләщәл хотн верәнтса, хән Тәтья 8-мит классән вәнтлүләс. Лўв ясәлн, хәл юх пириты пәта лўв әщәл Александр Иванович пида вәнта йңхсәңн. Хәл

юх хурамтты пәта хурамәт лўв Ольга па Марина апәлнәңдал пида верәс:

» Щит ищи вәсәт ийха кәртум непек лакәт, ши мултас па ар хурасуп непек расңаятн хурамтсәв, алпа, щит «ёрт». Непек эвәлт апәлнәңдал пида па Китай мўв щир фонарикәт па гирляндайт версўв. Щитлўв ищи хәл юха мәстүпсәлўв па хот йитңевн ихәтсўв. Ши оләтн, алпа, мет олаң пўш ай утләм әшкола эвәлт мойлупсы хирәт тәсәт, щәта мавәт па епләң нянят вәсәт.

Ләтум юнтүтәтн хурамтум хәл юх мет олаң пўш Татьяна Александровна хотәлн омсәлтәс, хән лўв институт етшумал юпийн Мурманской области Сафоново вошн январемәт вәнтлүман вәс. Щирн тынысайт ишни лыс эвәлт верум нохрәт, сәк гирляндайт, тўтәң гирлянда хулна ән тайс. Хәл юх әхтыйн вет ёшпи хәс вәс.

Там хәтл хәл юх ар щира хурамтты пищ вәл. Татьяна Александровна хотн там тывты Йилуп ол пәта кәт хурамтум хәл юхәңн лоләләңәң. Щит Оксана меньл ләтум па хурамтум хәл юхәңн.

Путәр хәншәс:
Пётр Молданов



Ван хатлуп тылаш 13-мит хатлән Ваньшават кэртәң хуятат Вулаң Отечественной дэлын дэласум ёх пата омсум кев хурас пўңалн а́кташсат. Дыв Ваньшават кэрт эвэлт Сўмәтнюл кэрт вәнты лухн мәнты сонтумәсат. Там вер «Самутнёл» шуши мират община хуятат округ губернатор грант нётупсы унтасн лэщәтсат. Мосл лупты, мет сыры тамәш лухәң шәшупсы 2015-мит олн версы, хән Вулаң Победа тывум вўш эвэлт 70 тәл постәсы.

Сўмәтнюл кэрт вәнты лухн мәнсәт



Лухн яңхум хәннехуятат



Сўмәтнюл кэртәң кев хурас

Община кәшә не Валентина Ирган вўща ясаң путәртмәлн лупәс:

» 2025-мит олн кәт вулаң вер постәсўв, щит Вулаң Отечественной дэлын нух питум хәтл вўш эвәлт 80 тәдә ийс па Ёмвош округев 95 ол постәсы. Щит пата там лухәң шәшупсы щит вулаң верңәна юкантсәв. Вулаң Отечественной дэлы пурайн Россия мўев 26 миллион 600 шурәс хәннехә вәтшәс. Полнавәт па Касум сельской советңән эвәлт 611 хуят дэлы хәрәтә тәсыйт па 434 хуят юхи әнт юхәтсәт. Там лўңән Сўмәтнюл кэртәң кев хурас омәссўв, мәта ут 1941-1945-мит олатн

дэлы хәрәтн пәрум ёх пәта версәв.

Ваньшават ашкола кәшә не Наталья Бусыгина ищи әкмум ёха хошум вўща ясәт лупәс. Мосл лупты, лўв пухәл СВО тәхийн дэласман вәл. Щәдәта Нуви сәңхум район думайн молодёжной палата тәхия луңты не Нина Брусенцева лухн мәнты хуятәта ям ясәт путәртәс.

Щи юпийн әкмум хуятат Ваньшават кэртәң кев хураса әня лыптәт пунсәт па лухәң әшн мәнты сонтумәсат. Дыв Сўмәтнюл вәнты лухн шәшсәт, юлта па «Бурән» әхләтн хәйт мәнсәт, дәлн мосты пурайн

нётумты. Нуви сәңхум вош па Полнавәт кэрт эвәлт «снегоход» карты хопәтн ищи хәннехуятат щив мәнсәт. Сўмәтнюл кэртәң дыв вәйтантийлсәт.

Щәта СВО тәхийн дэласум кәтңән Алексей Дубинин па Михаил Сапелко ийха юхтум хуятәта вўща ясәт путәртсәңән. Айлат хуятат эвәлт Нуви сәңхум дума молодёжной палата тәхия луңты не Стелла Тришкина ям ясәт лупәс.

Щәдәта юхтум ёх кев хураса әня лыптәт пунсәт па хәсдә лольсәт, Вулаң дэлын па СВО тәхийн пәрум ёх нәмәлмәсәт, щит

юпийн пушкан эвәлт салют есәлсәт. Мўң веккеши нәмты питләлўв щит хуятат, хуятат рәт мўвәл пата дылдәл пунсәлдәл.

Щи юпийн ай кәрта юхтум хуятат пата етнхот версы, дыв кәсупсәтн кәссәт, арәт арисәт, дэлы пурайн тарәндум па рәпитум вән хуятләл олаңән нәмәлмәсәт па путәртсәт. Кашәң щив юхтум хуятәта ишәк непек па мойлупсы мойдәсы.

Валентина Ирган
Хәнты ясаңа тулмашсәт:
Надежда Вах



Ханты ясӑң



Январь (Ас халты тылӑш)

ПН	5	12	19	26	
ВТ	6	13	20	27	
СР	7	14	21	28	
ЧТ	1	8	15	22	29
ПТ	2	9	16	23	30
СБ	3	10	17	24	31
ВС	4	11	18	25	

Февраль (Тӑнлуп тылӑш)

ПН	2	9	16	23
ВТ	3	10	17	24
СР	4	11	18	25
ЧТ	5	12	19	26
ПТ	6	13	20	27
СБ	7	14	21	28
ВС	1	8	15	22

Март (Ай кер тылӑш)

ПН	2	9	16	23	30
ВТ	3	10	17	24	31
СР	4	11	18	25	
ЧТ	5	12	19	26	
ПТ	6*	13	20	27	
СБ	7	14	21	28	
ВС	1	8	15	22	29





2026 ол



Апрель
(Вән кер тылăш)

ПН	6	13	20	27	
ВТ	7	14	21	28	
СР	1	8	15	22	29
ЧТ	2	9	16	23	30*
ПТ	3	10	17	24	
СБ	4	11	18	25	
ВС	5	12	19	26	

Май
(Ас нопăтты тылăш)

ПН	4	11	18	25	
ВТ	5	12	19	26	
СР	6	13	20	27	
ЧТ	7	14	21	28	
ПТ	1	8*	15	22	29
СБ	2	9	16	23	30
ВС	3	10	17	24	31

Июнь
(Лыпăт тылăш)

ПН	1	8	15	22	29
ВТ	2	9	16	23	30
СР	3	10	17	24	
ЧТ	4	11*	18	25	
ПТ	5	12	19	26	
СБ	6	13	20	27	
ВС	7	14	21	28	

Июль
(Вăш тылăш)

ПН	6	13	20	27	
ВТ	7	14	21	28	
СР	1	8	15	22	29
ЧТ	2	9	16	23	30
ПТ	3	10	17	24	31
СБ	4	11	18	25	
ВС	5	12	19	26	

Август
(Вăйт дор тылăш)

ПН	3	10	17	24	31
ВТ	4	11	18	25	
СР	5	12	19	26	
ЧТ	6	13	20	27	
ПТ	7	14	21	28	
СБ	1	8	15	22	29
ВС	2	9	16	23	30

Сентябрь
(Лыпăт хойты тылăш)

ПН	7	14	21	28	
ВТ	1	8	15	22	29
СР	2	9	16	23	30
ЧТ	3	10	17	24	
ПТ	4	11	18	25	
СБ	5	12	19	26	
ВС	6	13	20	27	

Октябрь
(Ай тăхет потты тылăш)

ПН		5	12	19	26
ВТ		6	13	20	27
СР		7	14	21	28
ЧТ	1	8	15	22	29
ПТ	2	9	16	23	30
СБ	3	10	17	24	31
ВС	4	11	18	25	

Ноябрь
(Ас потты тылăш)

ПН	2	9	16	23	30
ВТ	3*	10	17	24	
СР	4	11	18	25	
ЧТ	5	12	19	26	
ПТ	6	13	20	27	
СБ	7	14	21	28	
ВС	1	8	15	22	29

Декабрь
(Ван хăтлуп тылăш)

ПН		7	14	21	28
ВТ	1	8	15	22	29
СР	2	9	16	23	30
ЧТ	3	10	17	24	31
ПТ	4	11	18	25	
СБ	5	12	19	26	
ВС	6	13	20	27	



Икет верты йис пурмәсәт: щухри



Щухри верты вәндтәйлдәһән. П. Молданов верум хур

Щи верәтн дыв пи-
дәдә тәс ёшуп ву-
халь хәннәхә Сергей Хо-
зумов рәпитәс. Актупсы
арсыр мир пәта верәнт-
са: музетн па культура
хотәтн рәпитты мир пәта,
тәс ёшуп хәннәхәйта,
няврәм вәндтәты ёха,
арсыр пурмәсәт верты
вәндтәйлты айдат хуятә-
та па иса ёха, мәта хуятәт
хәнты па вухаль мир йис
верәт вана тәйты каш
тәйлдәт.

Лупты мосл, йис хәнты
па вухаль ёх вәлупсийн
вера ар хурасуп кешет
вәсәт, арсыр тәхетн щи
кешет тәйсәйт, ар щира
щи кешетн мултәт версәт.
Кимәт щирн ки лупты, йис
вәлупсийн кеши – щит әл
пурмәса хән тәйса, кешәт
ёмәң щира вәсәт.

Щухри – щимәщ кеши
вәс, мәта ут икетн иса
пүш пәнән тәйса, щитәт
сотпәң кешия алыщәсәйт
па әнтуп келәтн иса пүш
вәсәт. Щухри такды икет
хүв тәхия вәлпәслуман ән
яңхийдсәт, щухри кешийн
сыр-сыр вүсәт пурдисәйт,
оңат эвәлт верты пурмәсәт
йирдал яма верты пәта па
щухри мосл, әхләң келә
верты шелокәт вәшумты
па ар щира тәйсәйт.

Кеши – щит кашәң хәннәхә
йокан пурмәс. Кашәң ики
кеши лүв ёшәлә мәстәты
щира верәнтсәлр. Хәннәхә
кеши – щит ёмәң пурмәс,
кушмәлтәты юпийн щи
кеши хонтыйлтәты щира
вүйлясы. Тәх кешет па
ёрнәс сухн ювәртман мул
сүңән ләңх щира тәйсәйт.

Кешет пида па ар-
сыр пицәт вәлдәт: кеши
ән рәхл долумты, кеши
долмум хәннәхә нәптәл
сухәңл; вәна ювум аки ям
ясәң лупман хиләдә кеши
мойдийдәс, щирн лүв өрл,
лүв щомәл хиләдә мәңл;
пори верты елпийн хәнмәт
күтләлн кешет пеләтсәт,
щирн яха мәнум кәтңән
вәлупсы тўңа мәнты питл,
мень не ики хота ки мәңл,
ащел верум кеши пәнән
вүл, щирн ащел ләңхәтн
шавиман тәйты питла па
арсыр верәт, пицәт вәлдәт.

Вәйтантупсы пүншумн
ремёслайт хот кәща ими
Марина Кабакова әкмум
мир ещәлт ям вўща ясәң
лупәс па тәм икет йис
пурмәсәт верты әктупсы
оләңән ясәң тәйс:

» Ики йис щира верты
пурмәсәт муйдал ямәт,
дыв йис щира рәпитләт:
йох пурмәсәт верләт, ню-

Ас потты тыләщ 25-мит хәтл эвәлт 30-
мит хәтл вәнта ремёслайт Центр хот хуца
научно-практической семинар вәс – щит
вухаль па хәнты икет пурмәсәт верты йис
пицәт. Тәм вәйтантупсыя юхтум мирев йис
щирн щухри верты вәндтәсәйт.

ки, пўнәң сух пида рәпит-
ләт па лер эвәлт мулды
верләт. Тәм хәтл вўша ики
пурмәсәт нюр йис щира
верләйт: кеши ки – щит
кеши, тынцаң ки – тынцаң.
Тәп тәм хәтл шимл хуят
йис пурмәсәт верты хошл.
Лыв щи кўш каш тәйлдәт,
тәп пицел әнтә, вошн
енумсәт. Ар хуятәт па тәп
әңки пида муй па аңкаңки
пида енумләт. Вәндтәйл-
ты тәхи әнтә. Икет – щит
икет. Имет ван кўт ийха
әктәшийлдәт па иса верәт
оләңән путәртләт, икет –
щит па хурасупа вәлты ёх,
лэваса ән путәртләт. Ин
мўң Ёмвошн пиц тәйлүв,
ики йис пурмәсәт верты
вәндтәйлты тәхи тәйты
питсүв, ёшн хәннәхәй иты
пиц вәд па щи верәт елды
тәты.

Марина Викторовна
ясәңән:

» Тәм әктупсәв юпийн
кеши щимәщ пос йил, мәта
пелә вантман мўң нумсәвн
вәты питлүв, муй вўрн вән
вошн йис икет пурмәсәт
верты вер елды тәты пит-
сүв. Лүв па путәртәс ики
верәт оләңән, кеши муй
па па пурмәс – щит хўв
мәр верты пурмәсәт. Мет
сыры мосл ям юх вәйтты.
Тәм хәтл тыв вәндтәйлты
йохтум мирева мўң кеши
верты пәта шив мәстәты
йохн мәслүв. Еллы ёх
вәндтәты хән питлүв, мўң
вәндтәлүв, муй вўрн щи
йохәт вәнтән кәншты. Щи
щира мўңева ийха вәнта
мәнты мосл. Йис пурмәсәт
верты мирева яма вәты

мосл, муйсәр юх эвәлт
муй верла. Вәнши, сўмәт
йох па па юхәт муя верты
мәстәләт. Вәншет ищи ар
хураспет – мосл мосты юх
пириты муй па мулды юх
шәп. Щәлта па вәты мосл,
муй вўрн щи юх шавиты
мосл, вәты мосл, пурмәс
верты елпийн сорәлтәты
щи юх рәхл муй әнтә. Па
арсыр верәт вәты мосл.

Ёшәң хәннәхә Сергей
Хозумов – щит йис щира
пурмәс верты хә, лүв йис
ёхләл эвәлт иса верәта
вәндтәс, щит пәта лүв
хуцадә вәндтәйлты щира
вера ар ёх юхәтсәт.

» Вера ар хуят юхтәс, ма
нәмәссум, яңкем хуят питл,
щирн рәпитты ямшәк.
Ар хуят пида лавәртшәк.
Щит хуты кашәң хәннәхә
пида атәлт щира путәртты
мосл, атәлт щира лўвела
вәндтәты мосл, муй вўрн
верты, – путәртәл, Сергей
Хозумов.

Тәм щухри верты әк-
тупсыя юхтум ёх вәндсәт,
муй вўрн карты пида рә-
питты, муй вўрн юх пида
рәпитты, әктупсы хулам
йюпийн кашәң хәннәхә лүв
кешел ёшн катәлман юхи
щи мәнәс.

Ма щиремн, щимәщ
вәндтәты хәрәт шеңк мос-
ләт, вантә, тәта айдат ёх
арсыр мосты йис пурмәсәт
верты оләңән уша верләт.

Путәр хәншәс:
Пётр Молданов



^ Варьёган кэртэң мет олаң вэндыйлты хуятат



^ Вухсар тайты тэхийн рэпитты ёх

Варьёган кэртэң мир хурэң ванлтупсыйн

Интэм катра пурмэсэт давалты тэхи – щит антэ тэп культура тэхи, щата рэпатнекат йилуп щирн йис вэлупсы, пурмэсэт давалты вэндыйллат. И ишимэщ вер – щит «Варьёган кэртэң мир веншэ» немпи хурэң ванлтупсы.

Щит лэщэты, лэдн тыв кэртэң па мойң мира эмэщ юхатты ат вэс, тэм хурэ унтасн Варьёган кэрт вэлупсы олаңан уша верты рэхл. Муй щирн тэм кэртые тывэс, муйсэр мир тата вэсэт па тарма рэпитсэ. Хурэти мўң оп-

рашлўв, вэн хуятат, мўң аңкилўв-ащилўв, кэртэң мир шивалаты рэхл.

Тэм мосты вер 2015-мит ол вўш эвэлт тэлўв, кэртэң па мойң мира щит шеңк эмэщ вантты. Тэмэщ хурэң ванлтупсэ «Ночь в музее», «Ночь

искусств» ёмэңхэтиднэ пураин лэщэтилўв. Щи пураин кэртэң мир ям арат шос артэ хурэ вантман нэмэлмэлэ, муй щирн Варьёган кэрт тывэс, муйсэр ям ханнехуятат тата рэпитсэ па па эмэщ верэти олаңан уша верлат.

Мўң музей хотэвн кат шурэс мултас хур давалман вэл – щит хулыева мўң кэртэң мирев олаңан. Йис вэлупсэв давалты пата мўң рэпатнеклўв иса муй верлат, лэдн кэртэң па мойң мира тата эмэщ ат вэс. Йилуп вер тывэл ки, мўң нынана имухты ханшлўв.



^ К.В. Казамкин Киров немпи колхоз кэща хэ



^ Вой сухэти вўдыит

Зоя Казамкина,
Варьёган кэртэң
этнографической парк-музей
рэпатнек

Ханты ясаңа тулмаштэ:
Людмила Гурьева





50 ол мәр и нумәсн, и сәмн вәлдәңән



▲ Андрей Савватеевич па Павла Михайловна эвән па хилыдал пида

Павла Михайловна 1954-мит олн вүлсәң, әх хотн сема питәс. Хетта юханән аңкел-ашел пида ай пурайн вүлы ташн вәсәт. Аңкел – Анастасия Ивановна, ашел – Михаил Дмитриевич Тользиннән. Ашел па аңкел щәта касум совхоз бригадайн рәпитсәңән, нявремәт енмәлсәңән – Илья, Мария, Галина, Павла, Иван, Павел, Римма. Павла Касум ашколайн вәндтыләс, щәлта Елена Тоголмазова пида Лапәтнаңк воша строительной училищя вәндтылды мәнсәңән, вәндтылман, Тюмень воша практика яңхсәңән.

Щи пурайн мүн мывев вошәт иса ләщәтсыйт, хотәт омәсты тәхетн арсыр мирәт рәпитсәт. Яма вәндтылман пәта Москва хон воша китыйлсыйнән. Имудтыйн Павла юхи юхтәс па елды вәндтылды ан мәнәс, аңкел-ашел пида вәнтән вәс.

1975-мит олн ай кер тыләщн Касум совхозн

Ай кер тыләщ тыләщн Касум вош эвәлт Андрей Савватеевич па Павла Михайловна Каневнән вән емәңхәтл постәснән. Лын 50 ол мәр яха вәлдәңән, хәнтәт лупты ширн, 50 ол мәр и мевәлн шәшләңән, и шәншән шәшләңән.

Аңкел – Мария Никитична Канева, ашел – Савватей Канев. Аңкел-ашел вүлы лавәлман рәпитсәңән. Лүв тәп кәт ол луват вәс, аңкел әнтәма йис. Аңшәсел па аңқанкел пида енмәс.

Андрей Савватеевич ар ол бригадайн Касум совхозн вүлы лавәлты хәя рәпитәс. Кашәң ол вүлсәң әх кәсупсыйн кәсәс. Вүлы лавәлты верәт па митрайт

Вән пухиел Чечня хушә служитәс. Щи атум лалъ вантум пухәта юхи юхәттәл пурайн юдн вәлупсыйн лавәрт вәлты, сәмлал, кәшитләт. Василий кәт нявремәл ая вәснән, хән әнтәма йис.

Татьяна эвиян Касум ашколайн вәндтыләс, щәлта Нуви сәңхум вошн колледжа вәндтылды мәнәс. Таня икия мәнәс па хоттел әхләл пида Ваньшавәт кәртән вәлдәт. Щәта икел пида рәпитләңән, хәлум нявремие енмәлләңән – Аня, Миша па Вова.

Тәм вәна ювум кәтнән ин и лотн әнт омәсләңән. Андрей Савватеевич тәм ол 70 ода йил, ин вәнты щи вәнта вүлы лавәлман лүңән па тәлн вүлыдал хушә яңхийл. Павла Михайловна пуркаит, вейт ентәл. Лүв ентум хурамәң ләмәтсудхәлн нявремәл, икел яңхләт.

Касум вошн вәлдәңән, лын хушәна рәтнайдал, хилыдал юхтылләт. И нумәсн, и сәмән вәлты кәтнән пәда верә әмәш вантты.

Тәм ям хәннәхәйңән мүн иши ям ясәңән китләлүв. Йисәңә-нәптәңә ат вәлдәңән, уяңә-пишәңә ат вәлдәңән.

Путәр хәншәс:
Светлана Рандымова



▲ А.С. Канев вүлсәң әх кәсупсыйн. С. Рандымова верум хурнән

рәпитты питәс, 2009-мит олн пенсия мәнәс, 34 ол мәр рәпитәс.

Андрей Савватеевич Канев Касум вошн сема питәс, лүв вән сәран семайн мет ай пуха вәс. Николай, Мария, Владислав, Петр, Клавдия яйдал па упилал вәсәт.

яма вәлдә. Щи пурайн вән ташн атл-хәтл рәпитсәт.

Андрей па Павла яха мәнум юпийн вүлы ташн нәлмит бригадайн рәпитсәңән, Касум вошн вәснән. Нявремәңә йиснән, Василий па Татьяна нявремнән сема питсәңән.



Ёмвошн ван хӓтлуп тылӓшн 9-мит хӓтӓлн йис пурмӓсӓт шавиты «Торум Маа» музей хущи «История Ювана Бороды» ванлтупсы вӓс. Щит вухаль ики Иван Ильич Куриков олаӓӓн лӓщӓтса.

Сыр-сыр хурӓт, пурмӓсӓт па йис киникайт тӓм ванлтупсы лӓщӓтты щира «Отражение» йис пурмӓсӓт шавиты центр тӓхийн рӓпитты неӓт тӓсӓт. Щи тӓхи Талинка вошн Советской район хущи вӓл. Тӓм пурмӓсӓт Иван Ильич эвелн Анисья Ивановнайн тӓм тӓхия ипӓша щира шавиты мӓслӓ.

Иван Ильич Куриков Ивдельской район Лямья паульн сема питӓс. Лӓв олӓӓлн щимӓщ путӓр вӓл, мӓтты, Иван Ильич ай пурайн шеӓк мӓша йис, щирн ӓкелн-ӓселн пӓп ики хущи ймӓлты щира тӓса. Ин ёмӓӓ ики ястумал, мӓтты, няврӓм перна посӓн мосл пунты. Щӓлӓтши йӓпийн ин няврӓм ёшл нух щи пунсӓлӓлӓ. Щи пӓп ики щемья хущи лӓв ёнмӓс. Киникайт лӓӓӓтты па хӓншты вӓнлӓс. Иван пух хӓл, вӓнт вой велпӓслӓты верӓта йма вӓнлӓс.

Лапӓтхушьяӓ ода йӓвмал пурайн Иван Ильич Мария Ивановна Дунаева Атымья пусӓлн омӓсты Вершина кӓрт элты имия вӓслӓ. Яха мӓнман йӓпийн лын Пелым пӓсл хонӓӓӓн омӓсты Гарёвка кӓрта вӓлты щира мӓнсӓӓӓн. Щӓта вӓн хот омӓссӓӓӓн па хӓт няврӓм тӓйсӓӓӓн. Марья имел, ястӓлӓт, мӓтты айтӓлн пушканӓн велпӓслӓты хошӓс. Анисья эвел ищи айтӓлн лӓӓки велпӓслӓты хошӓс.



Юван Еля хилнеӓӓл пилӓ



Юван Марья имел рӓтлӓл пилӓ

Лозьва юхан маньщи хӓ

Юван ики имел пилӓ ар мис, лов, ош, щижӓрӓк тӓйсӓӓӓн. Лын лапӓт амп тӓйсӓӓӓн. Дамочка немпи ампӓн вӓлӓ лавӓлмал, Вӓрты ампӓл курӓӓ вой нӓхлӓс, Паль немпи ампӓн нюхӓс кӓншӓс, Шамша немпи ампӓн па лӓӓки вӓйтӓс, Некши нем тӓюм ампӓн мойпӓр вӓйтӓс.

Юван ики тӓсыева хошӓс саӓквилтапӓт верты па йма юнтты. Лӓв шӓкляӓ вӓрты тӓш таймал сайн, щирн Юван Борода немн пунса.

Лӓв вӓлмал хӓват вӓлӓ лавӓлман па вӓс. Хӓлумсӓт кем вӓлӓ таймал. Товийн, хӓн вӓлӓт Кев пелы воштӓты пурая йил, мӓнты ёшл хӓватн вӓлты мир вӓлӓт лӓв вӓлӓ ташӓла пилӓтӓлӓт, па Юван икен Кев пелы ташӓл воштӓлӓлӓ. Щи пурайн вӓлӓ ташӓл шурӓс кема йил. Кева мӓнтӓл елпийн поры верлӓт, лӓлн вӓлӓ таш лӓӓӓн тайты тӓхет пелы тӓлаӓа ат юхӓтсӓт. Лӓӓ мӓр Юван ики вӓлӓт щӓта тӓйлӓлӓ па сӓсн юхлӓ воштӓлӓлӓ.

Пелыма юхтылты Лениград, Москва элты



Иван Ильич Куриков, 1978-мит ол

учёной мир Юван икен олаӓӓн щиты ястӓлӓт:

» Рӓщ ясӓӓӓн йма путӓртты хошл, рӓт вӓнт мӓвӓлӓ шеӓк йма вӓйтӓлӓлӓ. Лӓв имел па йма рӓщ ясӓӓӓн путӓртты, лӓӓӓтты па хӓншты хошл.

Юван ики имел пилӓ мойӓ ёх тӓӓа-щираӓа вана вӓлӓлӓ, лапӓтлӓлн, лын хотӓнӓн ар улты нуры тӓйсӓӓӓн.

Тӓм ванлтупсийн Иван Ильич Анисья Ивановна эвел па Елена Николаевна Степанова хилнеӓӓл вӓсӓӓн. Лена хилнеӓӓл ястӓл:

» Ма аӓщаӓӓм йма ӓн нӓмлӓм, лӓв ӓнтӓма

йӓвмал пурайн ма хулна ай вӓсум. Тӓп нӓмлӓм, муй щирн хопн яӓхсӓв, мӓнӓм хӓлн лапӓтсӓлӓлӓ. Аӓӓм аӓщаӓӓм олаӓӓн мӓнӓма ар путӓртылӓс. Аӓӓм рӓщ ики вӓс, тӓп аӓщаӓӓмн шеӓк сӓмӓӓа тӓйсӓ. Хӓл велпӓслӓты, вӓнт вой мушӓтты, вӓлӓт лавӓлты пишӓта иса лӓвӓл вӓнлӓтсӓлӓ.

Иван Ильич ӓнтӓма йӓвмал пурайн хӓтӓӓӓ ода йӓвантыйс. Лӓв йӓпелн Ивдельской район хущи вӓлӓ ташӓт тайты немӓлӓт хуят ӓн хӓшӓс. Ин тӓм йисн Ивдельской районӓн тӓп 137 маньщи хуят вӓл.

Путӓр хӓншӓс:
Наталья Краснопеева



Аңки верум ясәң

И мултыйн па и вәтща мұв авәтн, и вәтща нәрум авәтн шеңк нұшая и ханты имиләңкие вәлмал. Лұв хәлум пух таймал па енмәлмал. Ши киньща ар тәл мәнл, ар лұң пәрл, хуты ин пухлад енумсәт, вәна йисәт, нюхеңа-лан-тәңа питсәт, әрн-щомн юхәтсыйт. Аңкел ими па иса пиршәмәсы па әрләдн муй щомләдн тәләңтелн ши хәшуптәсы.

И пұш аңкел ими пухлад вана вохсәдә па щиты лывела путәртәс па партәс:

– Нын, пухиет, вәна ши йисты, ма па муй арат веритсум, муйкем әр па щом тайсум, щиты нынан енмәлсәләм. Ин нын ушәңсашәң вұшәт вәнты юхәтсәты, әрәңа-щомәңа питсәты. Юдн әл омәсман, хуты муй вұша нын юхәтты щирәт мушатләты. Ма щиремн, кашәң хәя мосл па мұвәта-йиңкәта мәнтыя па лұв яма вәлты-холты щирләл хәннәхуятәт кұтәтн кәнштыя. Мәта хәннәхә, вантә, и лотн ән омәс па мулты верәл, щит ищи-па ям вәлупсы щир лұвел мушатл!

Ши киньща аңкел лупум ясәңәт юпийн вән пухәл айлдыева хұв әшәлә мәнты ләщәтыләс. Аңкел ими нянь верәс, пухәлә мәслә па щиты ши лұвела нәхмәс:

– Тәм нянен тәп ши пураитн ләтыя веритләң, хән шеңк сәмен вохтыя питла. Щәлта лұвел тәләңтелн юхи ләтән кұтн, щит йилпа ям арат әрн-щомн нәң юхәтлйин па кашәң лавәртәң верәт еллы тўңширәңа па вәшкәтә ләщәтләң!

Щитәлн мет вән пухәл әктәщәс, сема питум, айтәдн енмум мұвл тәхи эвәлт хұв мұвәта-йиңкәта уяң па ташәң вәлупсы

лұвел кәншты еллы ши шәшмәс.

Хұв муй ван кұт лұв шәшәс, еша вәс шеңк сәмл вохты питса. Щәлта аңкел ими миюм нянь пәнән вўюм хирәл эвәлт нух талсәлә. Няньл па нух сормал, хулна пәңкәтн пуремәты лұвел ән рәхәс. Вән пухәл аңкел пәлә лыкашәс па лұв верум няньл әш йира така евәлмәслә па мәнум әшәлн еллы шәшмәс.

Щиты шәштад муй мәнтад щирн әш йирәлн омәстыя ай павәрт хота лұв ши юхәтл. Ай павәрт хот пўңләдн карты келн ил йирум ампа така лұв пәләла хурәттты керләл. Лұв хурәттты сыйл хәлман, хот ов эвәлт шәнш ил мукарум пирәщ ими етмал па ханты пухәл пида вұща верәл, щиты лұвела ин лупл:

– Ма хотем лыпия луңа-сәр, алпа, сәмен вохлә, ләтыя-яньщты ләңхалайн!

Ши киньща ханты пух мукарәң шәншәң пирәщ имийн ямсыева лапәтлә муй яньщләла па әхәт щимәщ ясәңәтн ши ястәлә:

– Ма яма вәйтләм, хуты ин нәң уяң па ташәң вәлупсы щир кәншты юхәтсән.

Тәм хотем шәнш пәләкн мұв вұс тайлум, лұв тәләңтелн йиңкән ләп әмәртса.

Нәңена мұв вұсемн вәлты, йиңкәт хулыева кев пўтемн нух әмәрттыя мосл.

Ши тәхи хуца нәң шеңк ар хәс шиваләлән. Тәм йилпа еттыя ат мәр йиңкән вәлты хәсәт хулыева нух ки әмәрләң, щит нәң уен па ташәң вәлупсы щирен ищи кўрумн вәйтләң!

– Я-а-а, щит хуты муй лавәртәң вер хән, ма лұвел ищи кўрумн ләщәтләм,



Ульяна Ефремова хәншум хур

– еша ишканьщман, па мұв эвәлт юхтум вән пух мукарәң пирәщ имела лупәс.

Хән етна пелка йил, вән пухәл нюки келәл па кев пўтл әләмәл па мукарәң имел хот шәнша мұв вұс эвәлт йиңк хуца вәлты хәсәт нух әмәртты мәнл.

Шеңк ар хәс йиңкәт пида лұв нух әмәртәс. Пура-пураин мұв вұс пәлә иллы вантыйл: «Кай! Щәта худна шеңк ар хәс йиңк лыпийн вәлтад». Щитәлн па ши кев путәлн йиңкәң хәсәт нух әмәртты пиньшәл. Мұв вұсәл илпийн хәсәт әл вурләләт лұв семңәләл елпийн, мәтты ки, няхләт: «Әмәрта, әмәрта мўнев, ищипа хулыева нухлы талтыя ән веритләң». Имултыйн аләң хәщла йил. Вән пухәл иллы пәды вантәлйил: «Иләң йиңк па хәс худнателыева хәщәс». Ин пух щимәщ нумәсн юхәтсы: «Мукарәң пирәщ ими әл щиты немасыя мәнәма ши йиңкәң хәсәт нух әмәрттыя тыв китәс, лұв әл щиты ма елпемн няхәс, муй щирн ши арат йиңк па хәс нух әмәрттыя рәхл?» Щитәлн вән пухәл лыкн ши юхәтлты, нюки келәл па кев пўтәл еллы вущкәслә, сора-сора юхлы шәшмәс.

Юхи юхәтмәлн, аңкел ими лұвела немүлты ән па лупәс, тәп ухләңкиел еша илшәк есәлсәлә.

Щәлта кўтуп пухәл хұв

мұвәта-йиңкәта уяң па ташәң вәлупсы кәншты еллы шәшмәс. Мәнтад елпийн лұвела аңкел ими ищиты нянь мәс па щиты лупәс:

– Тәм нянен тәп ши пураитн ләтыя веритләң, хән шеңк сәмен вохты питла. Щәлта лұвел тәләңтелн юхи ләтән кұтн, щит йилпа ям арат әрн-щомн нәң юхәтлйин па кашәң лавәртәң верәт еллы тўңширәңа па вәшкәтә ләщәтләң!

Хұв муй ван кўтуп пухәл еллы шәшәс па еша вәс сәмл вохты питса. Щәлта аңкел ими миюм нянь хирәл эвәлт талсәлә. Няньл тәләңтелн сорма ювмал, худна пәңкәтн пуремәтыя лұвел ән рәхәс. Кўтуп пухәл аңкел пәлә лыкашәс па лұв верум няньл әш йира така евәлмәслә, мәнум әшәлн еллы шәшмәс.

Щиты шәштад муй мәнтад щирн әш йирәлн омәстыя ай павәрт хота лұв ши юхәтл. Ай павәрт хотл пўңләдн карты келн ил йирум ампа така лұв пәләла хурәттты керләл. Лұв хурәттты сыйл хәлман хот ов эвәлт шәнш ил мукарум пирәщ ими етмал, ханты пух пида вұща верл патәмиты ши лұвела лупл:

«Ма хотем лыпия луңа-сәр, алпа, сәмен вохлә, ләтыя-яньщтыя ләңхалайн!»



Ши киньща ханты пух мукарең шәншәң пирәш имийн ямсыева лапатла муй янышдәла па әхәт шимәш ясәтн ши ястәла:

– Ма йма вәйтлөм, ху-ты ин һаң уяң па ташәң вәлупсы шир кәншты юхәтсән.

Тәм хотәм шәнш пеләкн мўв вўс тайлум, лўв тәлаңтәлн йиңкән ләп амәртса.

Һаңена мўв вўсәмн вәлтыя йиңкәт хулыева кев пўтемн нух амәрти мосл.

Ши тәхи хуша һаң шеңк ар хәс шиваләлән. Тәм йилпа етты ат мәр йиңкән вәлты хәсәт хулыева нух ки амәрдән, щит һаң уен па ташәң вәлупсы ширен иши кўрумн вәйтлән!

– Я-а-а, щит хуты муй лавәртәң вер хән, малўвел иши кўрумн ләшәтлөм, – ишканьшман па мўв эвәлт юхтум кўтуп пухәл мукарең пирәш имела лупәс.

Хән етна пелка йил, кўтуп пухәл мукарең иимел хот шәнша мўв вўс эвәлт йиңк хуша вәлты хәсәт нух амәрти ши мәнл. Шеңк ар хәс йиңк пила лўв нух амәртәс. Пура-пурайн мўв вўс пелы иллы вантыйл: «Кай! Щәта хулна шеңк ар хәс йиңк илпийн вәлтәл». Щәлта кўтуп пухәл вулаң лыкн юхәтлә, нюки келәл па кев путәл еллы вушкәслә, щитәлн сора-сора юхлы шәшмәс.

Юхи юхәтмәлн, әңкел ими лўвела нәмүлты ән па лупәс, тәп ухләңкиел еша илшәк есәлсәлә.

Ши киньща мет ай пухәл хўв мўвәта-йиңкәта уяң па ташәң вәлупсы кәншты еллы пела шәшмәс. Иштиты әңкелн лўв няньн мәса па партса, ләлн йиңәләл иты нәмүлты вер ән верәс, па веритты кемәлн вешката хәя ат вәс.

Хўв муй ван кўт мет ай пухәл еллы шәшәс па

еша вәс сәмл вохты питса. Щәлта әңкел ими миюм нянь хирәл эвәлт тәлсәлә. Няньл тәлаңтәлн сорма ювмәл, хулна пәңкән пуремәтыя лўвел ән рәхәс. Ай пухәл әңкел пела иса ән па лыкашәс па лўв верум няньл еша ләс па мәнум әшәлн еллы шәшмәс.

Әхәт лўв иштиты мукарең шәншәң пирәш ими пила вәйтантыләс па лупәс лўвела, хуты пәнән вўюм ләтутәт тайл. Щитәлн әңкел миюм няние лавемәс, пирәш имел хот шәнша мўв вўсәл эвәлт йиңкәт па хәсәт нух амәрти мәнәс.

Тәлаң ат мәр лўв вешката рәпитәс, йиңкән хәсәт иса хулыева нух амәртәс.

Имүлтийн аләң хәсәлн мукарең пирәш имел лўв хушела охтәс па тәмиты ши нәхмәс: «Ешәк пухие, шеңк вән па вулаң вер һаң версән! Йис пураитн тарум меңк ики тәта вәс. Лўв әл хуятәт тәюм мўвәт-йиңкәт, войт-хўләт муй вўлы ташәт тәм мўв вўс илпийн ил хәнәтсәлә. Щәлта лўв сәмл иштиты тәм хәсәт кўтн ил хәнәтәс. Һаң, вантә, йиңк пила ши хәсәт нух тәлсән па рўвәң хәтл найн меңк икен сәм нух вўштиты. Муй арат ташәт лўв тәта ил хәнәтәс, ин хулыева һаңена хәшсәт!»

Мукарең пирәш ими ясәт хәлман ай пух шеңк нух амтәс, арсыр мўвәтн па йиңкәтн вәлүм хәннәхуятәт ийха әктәс па меңк икен мўва хәнәтүм мўвәт-йиңкәт, войт-хўләт па вўлы ташәт хулыева лакки ортәс. Нўша хәйт па нәңәт кўтн әңкел ими шиваләс, щит лўв ясәл ширн иса енмәс па йм хәя-воя йис!



Владимир Енов
йис ех путрәт ширн нумсәл хўватн йилпа хәншум моньшәл



М.В. Кабакова

Йилуп ол – шимәш емаңхәтл, хута мўң нумәсн тайл-лўв мәнум оләт па лавәллўв йилуп ол.

2025-мит олн кәт вән емаңхәтл вәс – 80 ол Вулаң ләлн нух питум верев па мўң округев 95 ола ювум емаңхәтл. Тәм ол ремәслайт Центр хотн вера йма мәнәс: мўң йилуп верәт пўншсўв па еллы щит тәты питлўв.

Кашәң хәннәхәя вән пәмәшипа ясәң луплүм! Хуйтат мўң пиләва вәсәт па рәпитсәт, мўң пәнтәв еллы йма ат мәнл. Йилуп ол нынана әмәш верәт ат мойләл. Нын хотәң ехләң йма ат вәлләт па вәлупсы йма ат мәнл. Муй нын йилуп олн олңитты питләты – щит ат тывл. Кашәң хәтл нынана әмәш верәт ат мәл.

Йилуп ол пида! Ши йилуп ол мет йм ола ат питл! Уяңа! Пишәңа! Нәптәңа! Йисәңа вәлаты!

Югра ремәслайт Центр кәща ими **Марина Кабакова**



Е.Т. Федотова

Югра мўвн вәлты тыһәң мирев!

Йилуп ол пида! Тәм йилуп олн иса верәт йма ат мәнләт. Кашәң хәннәхә нумәсн тайты ат питл, муй лўв йилуп олн вўтьшәл верты – щиты ат йинмәл.

Мет вән вер еллы тәты мосл – мўң нявремлўва рәт ясәң вәнлүтәты. Па еллы ши верев тәты.

Па йм вўща ясәң культура рәпитты ехлўва китлүм. Нын рәпатаян мўң вәлупсәва вера мосман вәл.

Ма сәмн тайты – «Касум Ех» па «Торум Маа» музейңән – йилуп олн аршәк әмәш ванлупсы ат верләңән па мўң мирева шив яңхты әмәш ат питл.

Тәлаңа, йма вәлаты! Йилуп ол пида!

«Торум Маа» музейев кәща ими **Елена Федотова**



Вўды – увас мират таш па уй



▲ З.Н. Лозямова вўлэт олаңан пугартал



▲ Н. Жеманская ханшум хурат

Вўды увас мўвн вэлты хуят пата щит мет сама рэхты, мосты па тынаң вой. Шуши мират катра йис вўш эвэлт вўлэт тайты питсат, лыв патада щитуй па таш тэты вой.

Юрн мир поэт хә Юрий Вэллa тәм вой олаңан щиты пугартылас:

» Нынана вән вўдең таш мосл ки, нын хоттел, ехдән пида вўлэт шалитман па лавалман тайты питлэты, лэдн лывела ям ат вәс. Щи пурайн нынана ищи ям пил.

Учёной хуятат увас мўв луваттйин яңхсат па уша версат, хути хәннехуятата вўлэт таклы лаварт вэлты лэдн вәс.

Манум сўсн «Торум Маа» йис пурмәсат шавиты тәхийн вўлэт олаңан әмәщ вандтупсы верантсы. Щата пугартсы, хути нөрумн па

вәнтшушетн вэлты хантэт па юрнат пата вўлэт мет мосты па тынаң воята вәлләт. Вўды – щит хошум па хурамәң ләмәтсух, щит епләң па сытаң летут, щит сора яңхты щир па па арсыр вератн нәтты вой.

Вәндат ими Зоя Никифоровна Лозямова вўдең хоттел, ех хуши енмәс. Лўв пугартас, хути вўлэт хантэт пата, щит лыв вәлупсәл, вўды таклы хәннехуятата лаварт вэлты. Вўлэт тайты хәннехуятат айлатвўш эвәлт вўлэт пида енумләт. Пешие кашаң ки, юдн тайлы, лўв нявремәт пида енумл. Пушхиет ашколая мәнтәлн вўдые таклы мәремәдыйт.

Тәм йисн округевн кәт тәхи вәл, хута ар вўды тайлы па енмәллы, щит Казымской па Саранпаульской совхознән. Тәм тәхет 1930-мит олатн тывсәт, тата вўды ташат лавалман ар хәннехә рәпитәс. Лыв хотаң ехләл пида иса вәлупсәл



▲ Вўдең ех пурмәсат

хўват вўды ташат тайман әрмәт па вәнтәт хўват каслуптылсәт.

Учёной хуятат ищиты уша версат, вўлэт ол мәр ар хураса ювантләт. Кўрлал хуши лўнәң щимәщ лепәт пўталыет енумләт, мәта ут унтасн лыв нөрум мўв хўват яңхләт. Тәлн па щи пўталыет хулт пелы мәнләт. Семнәл, ищи хурасләл па щира ювантләт, товийн па лўнәң, хән хошма йил, – сорни-әм елпула йиләт, тәлн – питы вустәт.

Тәм вандтупсийн әмәщ хурат шивалаты щир вәс. Щит «Торум Маа» тәхийн рәпитты хә Вячеслав Кондин Кев мўв хантәт хуши вўюм хурат, ищиты Асугорской институтн рәпитты нә Наталья Жеманская олюпн па хәншты юхн хәншум хурамәң хурат вандтәсийт.

Вўлэт хәннехә пўңәлн хўв йис вўш эвәлт вәлләт па вән уй па щўнь тәләт.

Пугар хәншәс:
Надежда Вах

Ханты ясанг
(Хантыйское слово)
№1 (3685), 15.01.2026

Соучредители
Дума, Правительство
Ханты-Мансийского
автономного округа – Югры

Издатель
Департамент внутренней
политики
ХМАО-Югры

Редакция

ВРИО
главного редактора –
Рагимова Н.В.

Телефон (3467) 33-17-52(д.502)

Ответственный секретарь –
Вах Н.И.

Телефон (3467) 33-17-52(д.503)

Адрес редакции и издателя:

628011, г. Ханты-Мансийск,
ул. Комсомольская, 31
тел./факс (3467) 33-17-52 (д.510)

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:

ООО «Печатный Мир г. Сургут»,
ул. Маяковского, 14.

Индексы 04393, 54393

Тираж **2166** экз.

Заказ **8**

Цена свободная

Газета
зарегистрирована
Управлением Федеральной
службы по надзору в
сфере связи,
информационных технологий
и массовых коммуникаций по

Тюменской области,
ХМАО-Югре и ЯНАО.

12+

Свидетельство о регистрации
ПИ №ТУ 72-00796
от 23 января 2013 г.

Мнение авторов публикаций
не обязательно отражает
точку зрения редакции.